

Brak sklapaju bračni partneri u prisustvu matičara i dva svjedoka.

U naročito opravdanim slučajevima, nadležni općinski organ uprave može rješenjem dozvoliti da se brak sklopi ako je prisutan samo jedan budući bračni partner i punomoćnik drugog. U punomoći, koja mora biti ovjerena od suda ili notara, moraju biti tačno navedeni osobni podaci davaoca punomoći, punomoćnika i osobe sa kojom davalac punomoći želi sklopiti brak i datum izdavanja punomoći. Punomoć važi 60 dana od dana ovjeravanja.

Svjedok pri sklapanju braka može biti svaka punoljetna osoba koja ima poslovnu sposobnost.

Sklapanje braka vrši se na svečan način u posebno određenoj općinskoj prostoriji.

Na zahtjev budućih bračnih partnera matičar može odobriti da se brak sklopi na drugom mjestu, ukoliko za to postoje opravdani razlozi.

Sklapanje braka može se odobriti izvan prostorije nadležnog organa iz i ako ne postoje opravdani razlozi, u tom slučaju budući bračni partneri dužni su platiti naknadu, čiju će visinu odrediti nadležni općinski organ uprave.

**Služba za upravu, društvene djelatnosti
i zajedničke poslove**
Hamdije Pozderca 3,
77230 Velika Kladuša
e-mail: vkladusa@bih.net.ba
www.velikakladusa.gov.ba
Telefon: 037 775-315, lokal 22
Fax: 037-775-272

Bosna i Hercegovina
Federacija Bosne i Hercegovine
Unsko-sanski kanton
OPĆINA VELIKA KLADUŠA

V O D I Č

za sklapanje braka



Velika Kladuša, Januar 2020. godine

Porodičnim zakonom Federacije Bosne i Hercegovine („Službene novine Federacije Bosne i Hercegovine, broj: 35/05 i 31/14) i Zakonom matičnim knjigama („Službene novine Federacije Bosne i Hercegovine“, 37/12 i 80/14), propisan je postupak prijave i sklapanja braka.

Za postojanje braka potrebno je:

- a) da su budući bračni partneri različitog spola,
- b) da su budući bračni partneri izjavili pristanak za sklapanje braka i
- c) da je pristanak izjavljen pred matičarom.

Punovažnost braka

Brak ne može sklopiti osoba koja je već u braku.

Brak ne može sklopiti osoba kojoj je oduzeta poslovna sposobnost ili koja je nesposobna za rasuđivanje. Izuzetno, sud može u vanparničnom postupku dozvoliti sklapanje braka osobi koja je nesposobna za rasuđivanje ako utvrdi da je ona sposobna shvatiti značenje braka i obaveza koje iz njega proizlaze, te da je brak očito u njenom interesu.

Brak se ne može sklopiti između krvnih srodnika u ravnoj i pobočnoj liniji do četvrtog stepena uključivo. Ovo se primjenjuje i na odnos nastao potpunim usvojenjem.

Brak ne mogu sklopiti usvojlac i njegov usvojenik u slučaju nepotpunog usvojenja.

Brak se ne može sklopiti između: svestrani i snahe, zeta i tašte, očuha i pastorka i maćehe i pastorka, bez obzira na to da li je prestao brak čijim je sklapanjem nastalo ovo srodstvo. Izuzetno, sud može u vanparničnom postupku dozvoliti sklapanje braka navedenim srođnicima.

Brak ne može sklopiti osoba koja nije navršila 18 godina života. Izuzetno, sud može u vanparničnom postupku dozvoliti sklapanje braka osobi koja je navršila 16 godina života ako utvrdi da postoje opravdani razlozi da je ta osoba tjelesno i duševno sposobna za vršenje prava i dužnosti koje proizlaze iz braka i da je brak u njenom interesu.

Brak nije valjan ako je na njegovo sklapanje bračni partner pristao u strahu izazvanom ozbiljnom prijetnjom ili u zabludi o osobnosti drugog bračnog partnera ili o njegovoj bitnoj osobini.

Zabluda o osobnosti bračnog partnera postoji kad je bračni partner mislio da sklapa brak sa jednom osobom, a sklopio ga je sa drugom osobom.

Zabluda o bitnoj osobini bračnog partnera postoji kad se radi o osobini, odnosno okolnosti koja bi drugog bračnog partnera odvrtila od sklapanja braka da je za nju znao, a naročito u slučaju krajnje opasne ili teške bolesti, trajne i neizlječive spolne nemoći, trudnoće žene sa drugim muškarcem i ranije osude zbog krivičnog djela učinjenog protiv dostojanstva osobe i morala.

Rok za podnošenje prijave o namjeri sklapanja braka

Lica koja žele sklopiti brak dužna su podnijeti prijavu o namjeri sklapanja braka najkasnije 30 (trideset) dana prije svečanog čina sklapanja braka.

Prijava sa potrebnom dokumentacijom predaje se na Šalter 3 ili Šalter 4 Općine Velika Kladuša.

POTREBNA DOKUMENTACIJA:

1. Ukoliko su budući bračni partneri rođeni na području općine Velika Kladuša uz prijavu prilaži Izvod iz matične knjige rođenih.
2. Ukoliko su budući bračni partneri rođeni na području drugih općina u Bosni i Hercegovini uz prijavu prilažu Izvod iz matične knjige rođenih i Uvjerenje o slobodnom bračnom stanju.
3. Ukoliko su budući bračni partneri rođeni u inostranstvu prilažu uz prijavu Izvod iz matične knjige rođenih, Uvjerenje o slobodnom bračnom stanju i dokaz o državljanstvu posebno primjenjujući Zakon o važnosti javnih isprava u BiH, Međunarodne konvencije i Međunarodne ugovore.

Administrativna taksa za sklapanje braka:

1. Vjenčanje u toku radnog vremena – 30,00 KM
2. Vjenčanje radnim danom poslije radnog vremena – 50,00 KM
3. Vjenčanje u dane vikenda i praznika – 100,00 KM
4. Vjenčanje van zgrade općine Velika Kladuša – 150,00 KM

Nakon što podnesu prijavu o namjeri sklapanja braka budući bračni partneri su dužni pred ovlaštenim licem za sklapanje braka u skladu sa članom 18., članom 19. i članom 20. Porodičnog zakona Federacije Bosne i Hercegovine na Zapisnik dati izjavu o namjeri sklapanja braka.

Matičar će, na osnovu izjava osoba koje žele stupiti u brak, a prema potrebi i na drugi način, provjeriti jesu li ispunjeni uvjeti za postojanje i punovažnost braka. Ako utvrdi da nije ispunjen jedan od uvjeta matičar će usmeno saopćiti osobama koje žele sklopiti brak da ga ne mogu sklopiti i o tome sačiniti službenu zabilješku. Osobe koje žele sklopiti brak mogu u roku od osam dana od dana saopćenja i podnijeti zahtjev općinskoj službi nadležnoj za poslove opće uprave, koja je dužna zahtjev odmah razmotriti i donijeti rješenje.

Matičar u dogovoru sa budućim bračnim partnerima određuje datum sklapanja braka, koji ne može biti kraći od 30 dana od dana podnošenja prijave o namjeri sklapanja braka. Izuzetno, kada za to postoje opravdani razlozi, matičar može odobriti sklapanje braka prije isteka navedenog roka.

Matičar će preporučiti budućim bračnim partnerima da se, do dana sklapanja braka, uzajamno obavijeste o stanju zdravlja, da posjete porodično savjetovanište i upoznaju se sa stručnim mišljenjem i uvjetima za razvoj skladnih bračnih i porodičnih odnosa, kao i da posjete ustanove u oblasti zdravstva radi upoznavanja sa mogućnostima i prednostima planiranja porodice.

Matičar će buduće bračne partnere upoznati sa mogućnošću uređenja imovinskih odnosa iz člana 258. ovog Porodičnog zakona F BiH.

Matičar će buduće bračne partnere upoznati sa mogućnošću sporazumijevanja o prezimenu iz člana 31. ovog Porodičnog zakona F BiH i uzet će njihove izjave o prezimenu.

Ako na dan određen za sklapanje braka ne dođu jedan ili oba buduća bračna partnera, a izostanak ne opravdaju, smatrat će se da je prijava namjere za sklapanje braka povučena.